

Thursday, September 25, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

SWACHHATA HI SEVA

Swachhata Hi Seva hmalakna kal mek hnuaia Faina Hapta leh Faina Hnatlang runpui chu vawiin khan Mizoram hmun hrang hrangah huaihawt a ni.

Aizawl ah chuan tukin khan MINECO Open Gym tualah neih niin UD&PA Minister K.Sapdanga'n a hmanpui a, Faina Hnatlangpui hi October ni 2 Pu Mahatma Gandhi pianchampha thlenga neih tur niin "Ek Din, Ek Ghanta, Ek Saath" tia hming phuah a ni a, Minister Pu K. Sapdanga chuan veng, khawtlang, pawl, Zirna in te, kohhran leh sawrkar department anga Faina Hapta chhungin hma laho turin ngena a siam a. Faina Hapta khuh hawnnaah hian HDFC Bank chuan CSR Fund kaltlangin khawlaia bawhlawh hip khawmna lirthei - Garbage Vacuum Truck chu UD&PA Minister hnenah an hlan nghal bawk a ni.

Pu K.Sapdanga chuan Faina chungchang chu inzirna tam hle tawh mahse Faina chu mitinin nunpui theuh a, Faina in min chenchilh a ngai tawh a ti a. Faina Hapta hman chhungin khua leh tui te chuan mahni awmna hmun theuhah phur takin faina kawngah hma lak theuh bakah Faina Hapta a liam hnu pawhin faina ngaih pawimawh chhunzawm zel a ngaih thu a sawi a ni.

Faina Hapta pual hian MLA leh Corporator te pawhin an bial chhungah hmalak an tum a. Hmalakna langsar zingah Aizawl West I bialtu MLA Pu TBC Lalvenchhunga chuan a bial chhungah Local leh Village Council te Faina Intihsiak a puang a. He intihsiaka titha te hnenah Swatch Bharat Diwas kharna October 2 a neih hunah Lawmman pek a tum a ni.

Tukina Faina beihpui hawn zawhah hian Hnatlang runpui hawnna atan MINECO huam chhungah hmun 4-ah hnatlang neih nghal a ni.



BAPTIST ENGLISH SCHOOL

Baptist English School (BES), Serkawn Lunglei-a zirlai te chu tunlai tlang hrileng, an school-ah a hluar vangin vawiin atang khan sikul an chawl a, Civil Hospital Lunglei chuan vawiin khan New Building-ah BES naupang bik enkawlna tur ruahman sak in thisen sample hi ZMC lamah endik tur a thaw n turin an ruahman.

Baptist English School Principal Pi C Lalawmpuii sawi danin an school ah hian zirlai 1213 awmin heng te hi Lunglei khawpui chung veng hrang hrang atanga kal khawm an ni a, an damloh dan chu hritlang leh khawsik natak te niin luak te pawh an awm a ti a. Tunkar tir lam khan naupang damsamlo te chu Office-ah te la hrang in an nu leh pa te hruai haw tura phone an nei thin a ti a, Zirtirtu zingah damlo

thenkhat chu an ruh te a na a, hetiang anih vang hian vawiin leh naktuk chu chawlhah an puang tih a sawi.

Baptist English School hi Elementary School niin Class VIII thleng a awm a, tlar khatah naupang 4 te thut tir an ni a, a te zual chu 5 te pawh thut tir thin an ni. Karhmasa lam khan naupang nuam samlo chu School-ah kal tir lo turin School Whatsapp group lamah an lo in hriattir tawh a ni.

Tarlan tawh angin thawhtanni khan zirlai 325 chu damlohna avangin an kal thei lova, thawhlelni ah 445 an kallo a, nilainiah zirlai 528 an kal lo leh a, Zirtirtu kal theilo leh nuamsamlo engemaw zat an awm bawk a ni.



BOOK NEST INITIATIVE

Lungleia "Book Nest Initiative" hnuai lehkhabu khawn khawm kalpui mekah bu 6,000 chuang khawn chhuah a ni tawh.

Lunglei District Bawrhsap hma laknaa Lungsen Aspirational Block-a zirlaite tana Lunglei khawpui chhunga lehkhabu khawn khawm runpui, "Book Nest Initiative" kalpui mekah kumin September ni 8 atang khan Lunglei khawpui chhunga Sub-Headquarters YMA hnuai YMA branch 21 te'n an huam chhungah lehkhabu khawn khawmin, lehkhabu 6,000 chuang khawn chhuah a ni tawh a.

YMA branch hrang hrang hnuai section YMA te chuan an huam chhung in tinah kal chilhin zirlaibu leh thawnthu bu hluite an khawn khawm a. Lehkhabu khawn khawm sa hi branch tinah YMA leh Self Help Group-te'n thliar felin, sem chhuah theih turin an ruahman a. Lunglei khawpuia YMA branch 21 bakah, Lungsen YMA branch 3 pawhin lehkhabu hi khawn ve bawk a ni.

Lunglei khawpui chhunga YMA branch 11 chuan lehkhabu khawn leh thliar fel hi zo tawhin, hemi atang hian lehkhabu 6,299 hmuh a ni tawh a. Branch eng emaw zat chuan la khawn mekin, thliar fel an la hmabak bawk.

Lehkhabute hi sem chhuah theiha ruahman fel a nih hnuah Lungsen Aspirational Block huam chhunga sawrkar sikul 60 thlan chhuahte hnenah sem tura ruahman a ni.



AIZAWL CRIME BRANCH

Kumin chhungin Aizawl Disrict, Crime Branch-ah thubuai 1,286 ziah luh a ni tawh a, chung zingah chuan inrawk (burglary) thubuai a tam ber.

Akashvani Aizawl zawhna chhangin, Aizawl Disrict, Crime Branch a thawkte chuan kumin January ni 1 atanga September ni 21 thleng khan thubuai 1, 286 an ziah lut tawh a, thubuai kaihhnawiah hian mi 1, 379 man ni tawhin, chung zinga mi 939 te chu tualchhung mite an ni a, midang 428 chu state dang a mite niin, ram dang mi 12 an tel a, kumina thubuai ziahluh zingah hian inrawk thubuai tam berin, thubuai 510 ziah luh a ni tawh a ni.

Aizawl District, Crime Branch chhinchhiah danin, kum 2020 hnulamah kum 2022 kha Aizawl District-a thubuai ziahluh tam ber tum a ni a, thubuai 2684 ziahluh niin, mi 1586 man an ni a. Kum 2020, 2021, 2022 leh 2024-ah te chuan thubuai ziahluh zingah rukruk thubuai tam berin, kumin 2025 leh kum 2023-ah te inrawk thubuai ziahluh a tam ber thung a. Kum 2020 atanga kumin September ni 21 thleng khan thubuai hrang hrang vangin mi 8,162 man an ni tawh a, chung zinga mi 2,747 te chu tualchhung mite niin, state dang mi 629 leh ram dang mi 106 te an tel bawk a ni.



ZORAM THAR PRESS CONFERENCE

Zoram Thar Zofate Lairelna Inpui chuan Mizoram State Assembly Session-ah hnam anga an nihna chu Zofate a nih thu sawiho tura chhawp chhuak turin Speaker Pu Lalbiakzama hnenah ngenna an thehlut.

He thu hi vawiina Aizawl Press Club a thuthar thehdarhtute an kawmnaah Zoram Thar President Rev. Dr Zaichhawna Hlawndo chuan sawiin Mizoram State Assembly Speaker Pu Lalbiakzama hnena an ngenna thehluhhah hnam an nihna (national identity) chu Zofate a nih thu Session a sawiho tura chhawp chhuak tura an ngen bakah, hnam tobul an chhui chhuah atangin Zofate thlahtu Zo, Zova, Yo leh Jo a ni ti a pi leh puten an lo sawi thin chu Bible a Jakoba (Israela) fapa Zosefa kha a ni tih an hmuchhuah thu a sawi a, Zohnahtlak te chu Zosefa fapa pahnih - Ephraim leh Manesia thlah kal zel Zofate an nih thu te an ziaak tel a, ZPM Kaihhruai Mizoram sorkar pawhin Mizote chu eng hnam nge, tu thlahte nge tih official-a pawm tlak a awm theih nan 'Hnam Tobul Chhuichhuaktu' tur a lo din tawh angin, Assembly session awm remchan huna sawiho tura an ngenna thehluh chu Speaker pawhin lawm takin a lo dawng tih a sawi a ni.

Byte: Rev Dr Zaichhawna

Zoram Thar hruaitute chuan Zofate hnam nihna sawifiahna hi United Nations ah te, India leh Israel Prime Minister hnenah leh United Nations-a Veto power nei- USA, UK, France, Russia hruaitute hnenah an lo thehlut tawh bawk a. Kum 2021 December ni 17 khan Zofate hnam lungphun Thenzawlah hawngin, he hnam lungphunah hian Zo hnahtlak Zofate chi hming zawng zawk ziah vek a ni a, hnam peng leh pawl hrang hrang aiawhte nen inlungrualin Hnam Nihna Thuthlung (National Identity Referendum) siamin a nemngheh nan hming an lo ziaak tawh bawk a ni.

